


EPISTULA LEONINA

CCXLV

HEBDOMADALE
PERIODICUM LATINĒ SCRIPTUM,
QUOD ĒDITUR
E DOMO EDITORIĀ INTERRETIALI
CUI NOMEN EST
LEO LATINUS



<http://www.leolatinus.de/>

N.B.! EPISTULAS LEONINAS ACCIPIS G R A T I S ET S I N E ULLĀ OBLIGATIONE. NAM LEO LATINUS PUTAT HOMINIBUS LATINAM LINGUAM DISCENTIBUS AUT DOCENTIBUS CORDI ESSE VERBA LATINA. SI TAMEN TALES EPISTULAS ACCIPERE NON VIS, RESCRIBE HOC NOBIS: TUM STATIM NOMEN TUUM EX INDICE ACCEPTORUM TOLLEMUS.

HŌC TEMPORE DUO FERĒ MILIA HOMINUM LATINĒ DOCTORUM ACCIPIUNT EPISTULAS LEONINAS ELECTRONICĒ MISSAS. EPISTULAS LEONINAS I-CCXXXIX INVENIES IN INTERRETI SUB HAC INSCRIPTIONE, QUAE SEQUITUR:

<http://ephemeris.alcuinus.net/leonina/>

MAXIMĒ ID CURAMUS, UT COPIAM VERBORUM LATINORUM CONVENIENTER AUGEAMUS ET TEXTŪS MODERNOS CUIUSVIS ARGUMENTI QUAM OPTIMĒ IN LATINUM SERMONEM CONVERTAMUS. ROGATUR, UT MANUSCRIPTA MITTANTUR VIĀ ELECTRONICĀ. MENDA SIVE GRAMMATICA SIVE METRICA, QUOAD FIERI POTEST, TACITĒ TOLLUNTUR.

EN HABES EPISTULAM LEONINAM
DUCENTESIMAM QUADRAGESIMAM QUINTAM (245) !

ARGUMENTA

PRAEFATIUNCULA.....	03-04
BONI PASTORIS EST.....	05
ECCE ANDREAS FRITSCH OCTOGENARIUS.....	06
MAGISTER MAGISTRORUM LATINITATIS.....	07-09
SYMBOLA WIKIPEDIANA QUAE SPECTAT AD IUBILARIUM.....	10-12
ECCE VIR CUI SERMO LATINUS EST TAMQUAM PATRIUS.....	13-16
CHRONOGRAMMATA DEMMINGIANA.....	17
CHRONOGRAMMATA RÖSSLERIANA.....	18-19
ECHUS VOCES EPISTULAE.....	20-26
CHRONOGRAMMATA HERBERTIANA.....	27-29
LIBRI LEONIS LATINI.....	30-33

PRAEFATIUNCULA

LEO LATINUS OMNIBUS HOMINIBUS LATINITATIS
AMANTIBUS SAL.PL.DIC.

Cara Lectrix, Care Lector,

*utinam saltim aliquatenus mediocriter valeas isto in tempore
pluvioso, ventoso, nebuloso. Perfer et obdura et carpe diem!
Noli oblivisci autumnum ferre etiam fructûs sapidissimos.
Nullâ autem ratione melius protegi atque confirmari systema
tuum immunitatis quam fructuum holerumque recentium
comestione necnon corporis subdiali exercitatione cottidianâ.*

*Sunt etiam tempore autumnali quidam dies lucidi laetique,
quibus sol nobis arrideat et animi nostri refocillentur. Tali die
Leoni Latino maximê placuit laudare cari sodalis merita
insignissima, qui Latinitatem vivam iam per plus dimidium
ferê saeculum mirabiliter fovet atque exauget, Leonis quoque
opusculis semper favens magnâ cum benevolentîâ. Eiusdem
enim sodalis maximê honorabilis nuper celebratus est dies
natalis octogesimus. Hoc iubilaeum extraordinarium Leoni
causae fuit, ut Epistulam suam ducentesimam quadragessimam
quintam dedicaret **ANDREAE FRITSCH**, qui est philologiae
classicae et disciplinae didacticae Professor emeritus
Berolinensis, necnon Latinitatis vivae auxiliator, animator,
amplificator admirabili ingenio atque industriâ praeditus.
Itaque editor huius Epistulae Leoninae tres textûs in sodalis
honorem scriptos veste Latinâ ornavit. Ad multos annos, εἰς
πολλὰ ἔτη, Andrea carissime! Gratias tibi agimus ingentes
et immortales, quod nos ditificas tantis operibus mirabilibus!*



ANDREAS FRITSCH
PROFESSOR EMERITUS

*Ergo – ut ait Apuleius Madaurensis in Asini Aurei prooemio -
»Lector (Lectrixve) intende: laetaberis«. Pancraticê vale et
perge mihi favere.*

Medullitus te salutat

Dr. Nicolaus Groß
Sodalis Academiae Latinitati Fovendae




<http://www.leolatinus.com/>

LEO LATINUS

Senden ex oppidulo Bavariae Suebicae,

Die Mercurii
27. m.Oct. a.2021




BONI PASTORIS ESSE TONDERE PECUS NON DEGLUBERE

SUETONIUS
Vita Tiberii 32,2

SUETONIUS, Vita Tiberii 32,2 Parem moderationem minoribus quoque et personis et rebus exhibuit. Cum Rhodiorum magistratus, quod litteras publicas sine subscriptione ad se dederant, evocasset, ne verbo quidem insectatus ac tantum modo iussos subscribere remisit. Diogenes grammaticus, disputare sabbatis Rhodi solitus, venientem eum, ut se extra ordinem audiret, non admiserat ac per servolum suum in septimum diem distulerat; hunc Romae salutandi sui causa pro foribus adstantem nihil amplius quam ut post septimum annum rediret admonuit. Praesidibus onerandas tributo provincias suadentibus rescripsit **boni pastoris esse tondere pecus, non deglubere.**

ECCE ANDREAS FRITSCH OCTOGENARIUS



Andreas Fritsch

***d.2. m.Sept. a.1941**

**Professor emeritus Berolinensis
philologiae classicae et disciplinae didacticae
Latinitatis vivae auxiliator animator amplificator
admirabili ingenio atque industriâ praeditus**

**OMNIA SPONTE FLUANT ABSIT VIOLENTIA RERUM
IOHANNES AMOS COMENIUS**

MAGISTER MAGISTRORUM LATINITATIS

**Perseverantiam effici variatione:
Andreas Fritsch 80 annos natus**

Symbola originalis in diem natalicium Professoris Andreae Fritsch scripta d.2. m.Sept. a.2021 divulgata est in Communibus Actis Diurnis Francofurtensibus (FAZ, i.e. Frankfurter Allgemeine Zeitung, p.11, titulus: „Lehrer der Lateinlehrer. Ausdauer dank Abwechslung: Andreas Fritsch wird 80“). Theodiscê scripsit Uwe Walter Biliveldensis¹ professor historiae antiquae, in Latinum convertit Leo Latinus.

Nonnullis septimanis ante *Amici Studiorum Classicorum* inter se consociati in Bochumensi Universitate Rurinae disputationem interretialem habuerunt, cui hunc titulum imposuerant insignem: »De studiis classicis a colonialismo liberandis«². Urbanê atque moderatê rationibusque politices socialis theoriaeque scientificae relatum est de argumentis, quae nunc in disceptatione proferuntur Americanensi. *Daniel Wendt* opinionem suam his in actis diurnis acriter defensam³ redegit ad exemplum practicum: romanas familias exemplares in libris germanicis linguae Latinae didacticis depictas omnes esse cutis albae, necnon servos ibidem videri paene familiares amatos; hoc facile posse mutari. Adversus hoc conamen disputationem reducendi ad rem a sensibus minus abstractam⁴ tamen quidam magister Latinitatis postea aridê adnotavit res hîc tractatas omnes quidem esse dignas auditu, sed nullo modo spectare ad ea, quae reverâ agerentur in scholâ – ibidem enim agi de ablativo absoluto deque munere linguam Latinam docendi sub condicionibus etiam etiamque difficilioribus. Tum adnuerunt multi huius colloquii zoomiani participes⁵.

¹ Bielefeld, cfr GRAESSE/ BENEDICT, *Orbis Latinus oder Verzeichnis der wichtigsten lateinischen Orts- und Ländernamen*, 2.Auflage, Berlin 1983, p.46: „Bilivelda, Bilveldia, Bilefeldia, Bielefeld, St., Preußen (Westfalen).“

² orig.: „*Decolonizing Classics*“.

³ orig.: „*in dieser Zeitung begründete scharfe Parteinahme*“. *Symbola in Communibus Actis Diurnis Francofurtensibus* d.12. m.Apr. publicata, quae inscribitur: «*Weißer Reformen erwünscht*» et incipit ab his verbis quae sequuntur: „*Wieso ist es nötig, die Wissenschaften vom Altertum zu ‚dekolonisieren‘? Weil die Frustration über Wissenschaftspraktiken das Misstrauen der nichtweißen Bevölkerung gegenüber dem politischen System verstärkt...*“.

⁴ orig. „*Erdungsversuch*“.

⁵ orig. „*Nicken auf vielen Zoomkacheln*“.

Etiam *Andreas Fritsch*, didacticus linguae Latinae, si quidem adfuisset, magistro certê assensus esset verbis efferenti, quantum valerent in institutione scholari cottidiana linguae ipsius tractatio atque exercitatio. Cum illi, qui litteras classicas non tractant nisi translatione utentes, semper periculum subeant, ne a re propriê tractandâ multimodis aberrent⁶, e contra ii discipuli viam ad mundos ferentem, in quibus Romani (et Graeci) versati sunt, ingrediuntur firmissimam, qui studeant discere ipsum sermonem textuum originalem – qui dicitur difficilis esse nec disci posse nisi magno cum labore atque perseverantiâ.

Quaenam esset ratio Latinam linguam discendi optima, hoc indagabat *Andreas Fritsch* magister et gymnasialis et universitarius. Didacticam disciplinam linguae Latinae instituendae îdem vir doctus in Silesiâ natus per spatium plus quadraginta annorum docuit, denique Berolini, in Liberâ Universitate, interdum etiam in Humboldtianâ; praeterea iterum iterumque institutionem habebat in variis scholis. In scriptis suis valdê multiplicibus et passim publicatis prius quam alii philologi studuit ratione criticâ investigare, quomodo tractatae essent linguae antiquae tempore socialismi nationalis et antea.

Etiam maturê *Andreas Fritsch* cognovit, ad argumentum vulgare refutandum, quo Latinitas dici solet esse emortua, quam utile esset Latinê loqui sermonemque Latinum ita adhibere vivum, ut fiant vera colloquia. Scilicet eundem philologum numquam desivisse cum magistris cooperari in componendis libris scholarum didacticis⁷. Ut adiuveret magistros Latinitatis, qui volebant varietatem lectionis augere, sed bonitatem non deminuere, *Andreas Fritsch* pro suâ subtilitate didacticâ atque paedagogicâ textûs Phaedri necnon bibliae Latinae ita tractavit, ut legi possent in institutione scholari. Neque îdem vir doctus parvi pendebat munus maximê necessarium, quo plus laboris solet exanclari quam accipi gloriae: Per plus viginti quinque annos *Andreas Fritsch* redactor⁸ rationem reddidit periodici associationis palaeophilologorum⁹ religendi.

⁶ orig. „Während ‚Classics in Translation‘ für alle möglichen Diskurskapaden anfällig sind...“

⁷ orig. „die Mitarbeit an Lehrwerken für die Schule gehörte zu seinem Portfolio.“

⁸ orig. Schriftleiter.

⁹ orig. Altphilologenverband.

Īdem professor nunc octogenarius, ut est latinista curiosus necnon magister amore docendi imbutus, ex longo iam tempore investigat opus Iohannis Amos Comenii paedagogi moraviani, qui saeculo septimo decimo non solum ipsam indolem infantium perscrutatus coepit artem paedagogicam excolere, sed etiam multimodis exauxit disciplinam linguae Latinae didacticam. Aliquamdiu Andreas Fritsch fuit praesidens Germanicae Societatis Comenianae. A.2014 ĩdem philologus nomismate Comeniano Pragensis Musei Paedagogici Nationalis necnon Bibliothecae Comenianae exornatus est. Nuper Professor Fritsch in epistulā editoribus Communium Actorum Diurnorum Francofurtensium missā Romanam Ecclesiam Catholicam necnon ipsum Papam vituperavit, quod Latinitatem negligenter. Hodie (d.2. m.Sept. a.2021) *Andreas Fritsch* Berolinensis Professor philologiae atque didacticae iubilarius celebrat diem natalem suam octogesimam.

UWE WALTER Professor historiae antiquae Biliveldensis

[https://de.wikipedia.org/wiki/Andreas_Fritsch_\(palaeophilologus\)](https://de.wikipedia.org/wiki/Andreas_Fritsch_(palaeophilologus))

Andreas Fritsch (qui est natus d.2. m.Sept. a.1941 in Silesiae oppido *Guhrau* (quod hodie appellatur *Góra* et spectat ad Poloniam). Îdem vir doctus est Germanus palaeophilologus, qui imprimis incumbit in Latinam linguam litterasque Latinas earumque didacticam tractandas.

Curriculum vitae cursusque honorum

Abiturio a.1960 Berolini superato Andreas Fritsch in Berolinensis Universitate Liberâ et Monasterii Vestfalorum studuit paedagogiae cognoscendae necnon maturê deditus est disciplinae scholari Latinitatis. Examine publico primo (a.1964) et altero (a.1966) superato munus suscepit magistri scholaris. Ex anno 1969 Fritsch docuit in Berolinensi Academiâ Paedagogicâ¹, anno 1972 titulo professoris ornatus est. A.1970 praeterea in Liberâ Universitate Berolinensi mandatum accepit didacticam linguae Latinae docendi. Ab a.1980 usque ad a.2007 îdem vir doctus fuit professor Universitatis liberae, a.1987 honoratus est titulo professoris universitarii. Praeterea per novem annos variis in scholis discipulos instituit linguâ Latinâ. Ab a.2001 usque ad a.2007 Andreas Fritsch in Berolinensi Universitate Humboldtianâ docuit disciplinam didacticam Latinitatis.

Îdem latinista compluries munera suscepit universitatis administrandae; fuit enim director *Instituti disciplinae didacticae linguarum litterarumque*, *Instituti disciplinarum didacticarum centralis*, necnon *Instituti philologiae Graecae et Latinae Liberae Universitatis Berolinensis*.

Provinciae ab Andreâ Fritsch specialiter tractatae

Provinciae investigandi, quas îdem philologus maximê tractavit, sunt hae quae sequuntur:

- historia et ars didactica institutionis Latinae, praesertim recensio et compositio librorum didacticorum,
- Phaedrus auctor in scholâ legendus
- Vulgata biblia Latina in scholâ legenda

¹ orig. Pädagogische Hochschule Berlin.

- Latinitas Viva, i.e. incitamenta ad Latinê loquendum
- institutio linguarum antiquarum, quae habita est tempore socialismi atque rei publicae Vimarianae
- studia, quae spectant ad Comenium (1592-1670)
- studia, quae spectant ad Fridericum Gedike (1754-1803) reformatorem scholarum Borussiae

Quatenus extra regionem Berolinensem meritis sit

Ex anno 1991 Fritsch est redactor periodici, c.t. „*Mitteilungsblatt des Deutschen Altphilologenverbandes*“, cui a.1997 impositus est titulus *Fori Classici*. Ab a.2005 usque ad a.2013 îdem latinista didacticus fuit praesidens Germanicae Societatis Comenianae et ex a.2005 sodalis Romanae Academiae Latinitati Fovendae (ALF). In diem natalem sexagesimum ei dedicatus est tomus quinquagesimus seriei *Auxiliorum*, quae êditur a *Friderico Maier* (*Alte Texte in neuem Rahmen*, tomus a *Stephano Kipf* editus), in diem natalem septuagesimum Andreae Fritsch dedicata est Bibliographia ad institutionem linguae Latinae 2 adhibenda sive Clavis Didactica, quam Bambergae a.2011 ediderunt *Stephanus Kipf* et *Marcus Schauer*.

Honores Andreae Fritsch attributi

Die 2. m.Dec. a.2013 Andreas Fritsch honoratus est ***Foederali Cruce Meritoriâ Classis Primae***, quia *îdem meritis est de linguâ litterisque Latinis earumque arte didacticâ*. D.26. m.Iunii a.2014 a Nationali Museo et Bibliothecâ Paedagogicâ Iohannis Amos Comenii Pragensi (*Národní pedagogické muzeum a knihovna J. A. Komenského*) eidem latinistae excellentissimo attributum est ***nomisma Comenianum***. „pro excellenti cooperatione proque scientiâ ac praeceptis Iohannis Amos Comenii in Germaniâ divulgatis“.

Literatur

- *Wer ist wer? Das deutsche Who's Who?* Verlag Schmidt-Römhild, 2009/2010.
- *Who is Who in der Bundesrepublik Deutschland*. 3. Ausgabe. Zug/Schweiz 1994.



ECCE PROFESSOR ANDREAS FRITSCH FOEDERALI CRUCE MERITORIĀ DECORATUS MANIBUS TENET LIBRUM LINGUAE LATINAE DIDACTICUM, CUIUS CONFICIENDI ATQUE EDENDI PARTICEPS FUIT: *CURSUS*. Oldenbourg Schulbuchverlag, München 2005, [ISBN 3-486-87705-4](https://www.isbn-international.org/number/3-486-87705-4).

- Uwe Walter: *Lehrer der Lateinlehrer. Ausdauer dank Abwechslung: Andreas Fritsch wird 80*, in: FAZ Nr. 203, 2. September 2021, S. 11.

INDEX OPERUM PROFESSORIS ANDREAE FRITSCH

<https://www.klassphil.hu-berlin.de/de/personen/fritsch>

„Ecce vir cui sermo Latinus est tamquam patrius“¹

Andream Fritsch Latinitatis didacticum Foederali Cruce Meritoriâ esse honoratum

d.31.m.Mart. a.2014



Andreas Fritsch palaeophilologus (a sinistris) accepit Foederalem Crucem Meritoriam e manibus ipsius *Knut Nevermann*, Berolinensis secretarii publici scientiarum, sibi oblatam.

Professor Andreas Fritsch: „Latinitas“ inquit „est disciplina quodammodo clavis traditionis Europaeae ideoque habet vim fundamentalem¹.“ Ex decenniis hic didacticus Latinitatis, qui etiam extra Germaniam in claritudinem pervênit, id curat, ut scholae et universitates et uniones philologorum melius inter se cooperentur. Quia de scientiis litterisque deque linguae Latinae arte didacticâ necnon de studiis socialibus multiplicibus optimê meritus est, îdem vir doctus septuaginta duos annos natus nunc honoratus est Cruce Meritoriâ Primae Classis Rei Publicae Foederalis Germanicae.

¹ orig.: „Ein lateinischer Muttersprachler.“

¹ orig. „ist elementar wichtig.“ cfr Nova Acta Eruditorum anno 1776 publicata. Lipsiae 1782, p.343: „...diversas esse potentias...modificationum instar transfundendas esse in **vim fundamentalem** seu primitivam...“

Iam illo tempore, quo fuit discipulus Collegii Canisii Berolinensis, Andreas Fritsch se praestitit esse amatorem Latinitatis fervidum eiusdemque linguae visus est cultor et magister futurus: Post abiturium a.1960 superatum îdem Berolini in Liberâ Universitate et Monasterii Vestfalorum studuit scientiae paedagogicae cognoscendae et specialiter incubuit in disciplinam Latinitatis docendae scholarem.

Iuvenis Latinista cursum suum honorum academicum incohavit sexagenariis annis finitis in Berolinensi Academiâ Paedagogicâ. Ibidem a.1972 factus est Professor disciplinae didacticae linguae litteraturaeque Latinae – propter „praestationes aequivalentes¹“ – sine promotione et habilitatione. Ex anno 1980 Fritsch docuit in Liberâ Universitate Berolinensi, ubi cum ceteris tum muneribus functus est directoris Instituti didactices linguarum litterarumque, Instituti disciplinarum didacticarum necnon Instituti Philologiae Latinae atque Graecae.

Îdem paedagogus hodie magnâ cum reverentiâ praeceptorum sui collegarumque recordatur studia sua academica et commercium communium operum scientificorum. Itaque Fritsch: „Amore disciplinae paedagogicae historicae” inquit “imbutus sum a *Professore Vilelmo Richter* qui fuit praeceptor meus in Berolinensi Academiâ Berolinensi; disciplinam didacticam ut scientiam institutionis scholaris empiricam intellexi *Volfgangi Schulz* gratiâ, collegae mei maioris natu, qui unâ cum aliis condidit eam didacticam, quae in scientiâ educatoriâ appellari solet «Berolinensis».” Quod attineat ad philologiam, se grato semper animo meminisse imprimis *Manfredi Fuhrmann* interim mortui necnon *Professoris Michaelis de Albrecht Heidelbergensis* emeriti quidem, sed usque nunc studia sua docta continuantis cum sedulitate fecundâ.

Ab anno 2001 usque ad annum 2006, quo rude donatus est, Andreas Fritsch effectum cuiusdam cooperationis Liberae Universitatis et Humboldtianae docuit etiam in Humboldtianâ. Îdem palaeophilologus adhuc est unus ex praepositis Germanicae Societatis Comenianae, antea usque ad annum 2013 fuit eiusdem Societatis praesidens. Ab

¹ orig. „gleichwertige Leistungen“. +aequivalens, -entis: cfr MLW (Mittellateinisches Wörterbuch) I,313: „aequivalens, -entis *qui eiusdem pretii est, aequipollens – gleichwertig.*“

eâdem autem foventur investigationes atque publicationes, quae spectant ad opus Iohannis Amos Comenii, qui fuit theologus, philosophus necnon paedagogus excellens saeculi septimi decimi.

Eundem virum doctum studia academica et praxin institutionis scholaris artê inter se coniunxisse

Praeter studia sua scientifica Andreas palaeophilologus optimê famatus eo quod etiam variis in scholis Berolinensibus discipulos instituit linguâ Latinâ, studia sua academica et praxin institutionis scholaris artê inter se coniunxit. Eodem viro auctore Berolini exorta est cooperatio scholarum et universitatum et unionum philologorum linguas antiquas colentium, qualis in reliquâ parte Germaniae est omnino nulla. *Knut Nevermann*, publicus secretarius Berolinensis scientiarum, in laudatione suâ, quam habuit in Crucem meritoriam attribuendam, dixit Andream Fritsch ratione exemplari demonstravisse modernos didacticos disciplinarum opera fecunda atque continua praestare non posse, nisi agerent consideratione historicâ nixi.

Philologia ab Andreâ Fritsch exaucta est symbolis operibusque, quae scripsit de Comenio didactico et Phaetro poetâ apologorum. Professori septuaginta duos annos nato maximê cordi est sermonem Latinum colere vivum et loquelarem, quem divulgare studet indefessê. Fritsch moderatus est circulis Latinê colloquendi necnon usque nunc naviter curat, ut in provinciis palaeophilologiae atque didacticae fiat commercium nationale et internationale. Collega eius *Stephanus Kipf* Professor Instituti Philologiae Classicae Universitatis Humboldtianae in oratione suâ in crucem meritoriam attribuendam habita: „Qui quaerit“ inquit „locutorem linguae Latinae nativum, inveniet Andream Fritsch Berolinianum verê genuinum¹.“

Cruciger pergit exanclare labores suos scientificos

Andreas Fritsch plus quingenta scripta variae amplitudinis publicavit, neque septem annis postquam rude donatus est îdem vir sedulissimus indefessê pergit publicare. Ex anno 1991 Fritsch est redactor *Fori Classici*, i.e. periodici Latinitatis atque Graecitatis in scholis docendis, necnon unâ cum aliis êdit librum annalem Comenianum. Andreas

¹ orig.: „Wer einen lateinischen ‚native speaker‘ sucht, findet ihn in dem Ur-Berliner Andreas Fritsch“,

philologus mirabili ingenii ubertate praeditus pergit scripta publicare et acroases facere in conferentiis seminariisque internationalibus.

Mense Aprili Fritsch Aeniponti in conventu Unionis palaeophilologorum Germanicae denuo instituet officinam Latinitatis vivae. Nevermann secretarius publicus: „Andreas Fritsch“ inquit „nobis exemplo est eo quod honoris causâ suscipit munera saluti communi utilia seque iterum iterumque praestat hominem comitate lepidissimâ summâque liberalitate praeditum.” - Îdem didacticus Foederali Cruce Meritoriâ honoratus nequaquam videtur desistere velle a docendo et investigando. Denique Andreas Fritsch nobis affirmat quidquid ipse egerit sive in rebus privatis sive in professionalibus, se semper hoc egisse secundum praeceptum Comenii paedagogi, quod sit: *Omnia sponte fluant; absit violentia rebus.*

Scripsit Lena Pflüger, in Latinum convertit Leo Latinus.



CHRONOGRAMMATA DEMMINGIANA

Zum Kunstgroßereignis in Paris September 2021

ARCVS TRIVMPHI VBIQVE IN ORBE
 PERNOTVS A CHRISTO ARTIFICE
 INGENIOSO ANNO PRIORE DEFVNCTO
 PARISIIS QVASI EX INFERIS VELATVR

Der weltbekannte Arc de Triomphe wird vom im Vorjahr verstorbenen genialen Künstler Christo in Paris gewissermaßen aus dem Jenseits heraus verhüllt.

hdf

Zum 6. September 2021

IEAN PA VL BELMONDO INSIGNIS HISTRIO
 FRANCOGALLICVS LXXXVIII ANNOS GENITVS
 PARISIIS OBIVIT


Jean-Paul Belmondo, berühmter französischer Schauspieler, ist im Alter von 88 Jahren in Paris gestorben.

hdf

CHRONOGRAMMATA ROESSLERIANA

Petrus Damiani Buck von Gebenstorf OSB

* 3. Oktober 1871 in Rieden, Kanton Aargau als Robert Buck
 † 25. September 1940 in Einsiedeln, Kanton Schwyz



TER QVINQVAGINTA ANNIS ANTE
 V NONAS OCTOBRES NATVS
 PETRVS DAMIANI BVCK OSB
 PATER STRENVVS
 EXPLORATOR NATVRAE INSIGNIS
 ATQVE
 OECOLOGISTES NOBILIS

MMXXI

Petrus Damiani Buck OSB
 wurde am 3. Oktober vor 150 Jahren geboren.
 Er war ein tüchtiger (Benediktiner-)Pater,
 ein ausgezeichneter Naturforscher
 und ein berühmter Umweltschützer.

Anton Gogeisl

* 30. Oktober 1701 in Siegenburg

† 12. Oktober 1771 in Peking



VVOLFANGVS FRANCISCVS ANTONIVS GOGESL
 IESVITA BAVARVS
 MISSIONARIVS STRENVVS
 QVINQVIES QVINQVAGINTA ANNIS ANTE
 IV IDVS OCTOBRES
 EX VITA EGRESSVS

* * *

ANTONIVS GOGESL
 RELIGIOSVS BAVARICVS
 ASTRONOMVS PRAESIGNIS
 QVINQVAGINTA LVSTRIS ANTE
 IV IDVS OCTOBRES
 PEKINI VITA CESSIT

MMXXI

ECHUS VOCES EPISTULAE

VICTORIUS CIARROCCHI PISAURENSIS

Sat, 25 Sep 2021 16:00:35 +0200

Victorius Nicolao suo sal. plur. dicit.

1) Antequam rem, de qua in titulo innui, explicem, te certiolem facio, mi Nicolae, de binis sentiis, quas in epistulis Leoninis 242 et 243 legi. In priore epistula (pag. 20, linea 4), equidem scriberem: "leva per fissare il Venturini". In altera (pag. 11, ultima linea) melius est: "tubo dello sterzo". Optima est Epistula numero 244 signata.

2) Conventui ALF interesse haud potero idcircoque neque te conveniam quia a proxima hebdomade in valetudinario iacebo, ut sectionem chirurgiam subeam aptam (ut speraverim) ad cancrum, quo in vesica laboro, exstirpandum vel minus nocivum reddendum. Hac de re iam Nicum De Mico, Theodericum Sacré, Gaium nostrum Licoppe (qui hoc de cancro vesicali plura explicare potest) certiores feci. Quoniam secreta servare non curo, nihil obstat quin sodalibus tibi mihique notis explanetur causa, quae me cogit ne Vobiscum intersim. Franciscus de La Rochefoucauld aliquo loco admonet- recte si memini - ne quis de suis ipsius morbis fusius loquatur. Tu autem erga me tam humaniter te gessisti, ut pro certo habeam te mihi ignosciturum. Optime valeas, care Nicolae.

Vivitur ingenio, cetera mortis erunt (Andreas Vesalius).

Victorius Ciarrocchi, Italus Pisaurensis.

Nicolaus Victorio sal.pl.

Gratias plurimas pro correcturis. O care amice, utinam operatio tui medica quam optime evadat et mox reconvalescas! Haec brevissime, cetera postea addam. Medullitus te salutatur Nicolaus.

THEODERICUS SACRÉ LOVANIENSIS

Am 20.09.2021 um 10:26 schrieb Dirk Sacré:

Theodericus Sacré sodalibus ALF optimis s.d.p.

Diebus 1 et 2 m. Oct. in aedibus Romanis Academiae Belgicae habebitur Coetus Generalis ALF. Ordinem rerum agendarum huic epistolio subiunxi. Spero fore ut multi sodales sessionibus intersint. Cum vero propter morbum illum Coronarium condiciones adhuc sint aliquatenus peculiare, humane a vobis peto ut Nicolaum De Mico sodalem et secretarium datis nuntiis quam primum certiore faciat utrum affuturi sitis necne [nicodemico4@gmail.com]. Curate ut quam optime valeatis!

Nicolaus Theoderico sal.pl.dic.

Gratias tibi ago plurimas, praeses Academiae maxime honorabilis, pro invitatione tua perhumaniter scripta. Sed valde doleo, quod propter sumptus molestiasque coronarias fieri non poterit, ut mense Octobri ineunte iter faciam Romam. Habeatis, quaeso, me excusatum. Ceterum spero te iam accepisse Epistolam Leoninam 244 modo tibi missam. Haec dixi brevissime, mox certe dicam plura. Medullitus te salutat Nicolaus Groß qui et Leo Latinus.

Theodericus Nicolao s.d.p.

Doleo quod Romam te non conferes, at idem rationes tuas intellego: quas (ita timeo) cum compluribus habes communes, unde vereor ne paucos admodum sodales coram ibi videam. Viderimus... **EL 244** ante horam mihi est allata et gratias pro ea tibi ago plurimas. **Nonne ipsa rubicundis, ut aiunt, genis erit evolvenda?** Tu vero pancratice vale!

Nicolaus Theoderico s. Gratias pro responso prompto. Quod spectat ad genas rubicundas EL 244 inspicientium, legas monitum Forbergianum necnon carmen Beccadellianum quod sequitur. Vale semper, medullitus te salutat Nicolaus.

MONITUM FORBERGIANUM: NON INTRET CATO THEATRUM NOSTRUM, AUT SI INTRAVERIT SPECTET. ---

MONITUM BECCADELLIANUM: AD MATRONAS ET VIRGINES CASTAS. *Quaeque ades, exhortor, procul hinc, matrona, recede;/ Quaeque ades, hinc pariter, virgo pudica, fuge./ Exuor, en braci jam prosilit inguen apertis,/ Et mea permulto Musa sepulta mero est./ Stet, legat et laudet versus Nichina procaces,/ Adsueta et nudos Ursa videre viros.*

Theodericus Sacré sodalibus ALF optimis s.d.p.

Thu, 30 Sep 2021 05:56:13 +0000

Digna sane sunt quae cognoscatis, sodales, incepta ea duo, quae nuntiantur in documentis huic epistolio adiunctis: alterum est de praemio, quod strenuis Latinitatis propugnatoribus donabitur, alterum de ludis quibusdam scaenicis. 'Almae Minervae praemium' condidit Collegium Latinitatis Hispanicum (in quo est Georgius Tàrrega, ALF sodalis), scholas vero scaenicas cum agone indixit Schola Humanistica Patavina (quam regit Iosephus Marcellino, et ipse ALF sodalis). Valete quam optime!

Nicolaus Groß sive Leo Latinus

Theoderico Sacré Praesidi Academiae Latinitati Fovendae (ALF)

sal.pl.dic.

S.V.B.E.E.V.

Theoderice Praeses maxime honorabilis,

die Saturni Zoomianae transmissionis - proh dolor - partim tantum particeps fui: duas acroases antemeridianas spectavi et audivi, deinde pausa mihi interponenda erat propter emptiones necessarias in oppidulo faciendas; post horam autem secundam postmeridianam proh dolor non iam annexum interretialem assecutus sum. Ceterum in situ Academiae interretiali nullum inveni Ordinem agendi Conventus annui - scisne, ubi talis sit?

In appendice invenies Indicem omnium vocabulorum Orbis Picti Hexagloti.

In animo mihi est proximis septimanis tibi mittere singulas partes GLOSSARII: cui insunt vocabula, versiones 5 linguarum, interpretamenta, etyma, explicationes ad neologismos spectantes etc. Scilicet propter ingentem copiam verborum commentatiunculae ne fiant nimis abundantes, sed tamen studeo easdem exarare satis doctas atque delectabiles.

Pancratice vale, care Theoderice, et perge mihi favere.

Medullitus te salutatur

Nicolaus Groß sive Leo Latinus

Theodericus Nicolao s.d.p. Doleo quod conventiculi (si ita appellandum erat) particulam tantum audire et videre potuisti; solent adhuc quae ad rem digitalem spectant molestias afferre et praepedimenta. IV autem illae orationes non erant in rete nuntiatae, sed in litteris ad sodales omnes circummissis: hoc enim erat propositum, ut sodales ii tantum qui praesentes affuturi essent, recitationi interessent. Ultimo vero temporis momento, cum paucissimos coram affore sodales animadvertissemus, rem et Zoomice divulgare statuimus. In coetu generali, quem habuimus die Veneris, dixi de progressu lexicis istius deque laboribus abs te exanclatis. Ibidem affirmavi verisimiliter fore ut res tota intra annum sequiannumve absolveretur. Nunc iam index verborum tuus allatus est. Optime! Partes eas, quas scribis, exspecto! Tum et sodales nonnulli, earum rerum periti, adhortandi erunt ad opus istud legendum ac recognoscendum. Interea vale quam optime!

MARCUS CRISTINI ITALUS

Il 10/10/2021 14:05, SPQR ha scritto:

Nicolaus Marco sal.pl.dic.

s.v.b.e.e.v.

Quid fit, quid agitur, care Marce, de te studiisque tuis Latinis? Ubi nunc versaris? Esne interim sodalis Academiae Latinitati Fovendae factus? Fuistine particeps conventus Academiae annui? Personaliter an interretialiter? Accepistine Epistulam Leoninam 244?

Equidem fere totus deditus sum Orbi Picto Hexaglotto componendo, cuius alterum tomum, i.e. Glossarium, nunc quadamtenus parturio. Velim tibi, si permiseris, proximis septimanis mittere glossas. In appendice invenies Indicem omnium vocabulorum huius lexicum. Inspicias, quaeso, et scribas mihi quidquid in buccam tibi venerit. Necnon narra mihi de vita tua, de studiis deque curis et gaudiis, ut fiat colloquium inter nos litterarum vivacissimum, quo animi nostri mirum quantum refocillentur. Vale pancratice, sodalis carissime, et perge mihi favere. Medullitus te salutatur Nicolaus qui et Leo Latinus.

Marcus Nicolao s.p.d.

Gratias tibi maximas ago, care sodalis, pro epistula tua humanissima proque indice verborum Orbis Picti. Hebdomada proxima praeterita Romae sessionibus Academiae Latinitati Fovendae personaliter (vel, ut verbis sancti Pauli utar, facie ad faciem) magna cum laetitia interfui, oratiunculam aditalem habui et sodalis factus sum. Magno mihi est honori in coetu illo doctissimo numerari et gratias imo ex corde ago iis sodalibus, qui nomen meum commendaverunt.

Quod ad me attinet, nunc Tubingae versor, ubi usque ad mensem Iulium manebo ut librum de rege Gothorum Baduila seu Totila apud universitatem studiorum scribam. Interea fragmentis quoque panegyricorum Cassiodori Senatoris studeo et, ut ad Latinitatem recentiorem transeam, nuper brevem symbolam de oratione Latina Oxoniensi ad Ioannem R.R. Tolkien laudandam *Voci Latinae* misi, quae ante paucos dies - ni fallor - typis tradita est. Commentario quoque longiori (Anglice exarato) operam do de primis fabellis Tolkienianis deque vestigiis Vergilianis in eis repertis. Mea sententia iuvenis Tolkien *Aeneida* memoria tenebat cum mythologiam suam pangere inceperet.

Epistulam Leoninam 244 accepi et libenter legi. Tibi gratulor de optima explanatione teleplani, aeronavis quae maximi est momenti in bellis hodiernis, ut nuper ostendit (exempli gratia) victoria Atropatenorum (sive Azerorum) adversus Armenos. Perge res recentissimas Latinitate induere!

Libenter glossas Orbis Picti inspicias; indicem iam raptim vidi et diligentiam tuam laudo. Index enim verborum pars est maioris momenti cuiusvis libri, quem autem haud pauci aut neglegunt aut omnino omittunt. Si sententiam meam aperire possum, inter numeros paginarum (e.g. 559,600) spatium addere mihi utile videtur (itaque 559, 600), cum Anglice 559,600 est unus numerus. Hoc paucis secundis perficies si favente "quaerere et substituere" lamina in plagula electronica indicis omnes virgulas quaesiveris et in earum locum virgulam et spatium miseris. Ceterum, fortasse verba similia (e.g. *lobus*, *lobus frontalis*, *lobus lateralis inferior* et sic porro) scribi possunt litteris minoribus praeter vocabulum primum (hic *lobus*). Minutiae autem sunt. Orbis Pictus Hexaglottus est inceptum laudandum, quod procul dubio magnum adiumentum ad Latinitatem re vera Latinam propagandam adferet, ut ea fere omnes ambitus societatis modernae amplectatur.

Cura, ut pancratice valeas.

Nicolaus Marco s.

Summas gratias, care sodalis, quod tam prompte, tam facunde tamqua perite mihi respondisti. Semper gaudeo de commendationibus tuis. Utinam opera tua Latina et vernacula eveniant quam felicissime!

Medullitus te salutat Leo Latinus

OSCAR WIDHOLM SUETUS OSLOENSIS

Sat, 25 Sep 2021 15:19:31 +0200

Salve Nicolae

Gratias tibi ago, pro epistula leonina ducentisima quadragesima quarta. Epigrammata vel carmina Beccadelli, quae plus eruditionis quam petulantiae praebent, iam perlegeram. Certe nugae illae lucernam olent, ut quidem sentio, potius quam unguentis et aromatibus, quibus templa Veneris fragrare solebant, ubi corpus vulgabant meretriculae, Erycinae, omnium deorum crudelissimae, dicatae. Languorem autem, quod vulgo dicitur, legentium animis minime afferunt. Elegans et dicaculus, ut humanistas italicos decet, Beccadellis noster apinas tricas suas effutiebat. Nec Satyra sotadica de arcanis amoris et Veneris mihi ignota erat. Sane auctor, gallicus ille Nicholaus Chorier, causidicus et scriptor rerum gestarum, ni fallor, eximiam latinitatem et copiam uberrimam verborum, quae ad res venereas pertinent, praebet. Neminem latet Nicholaum Chorier Alosiae Sigaeae Toletanae hispanicae eruditae, quae inter alia dialogos inter virgines probas exaravit, opusculum illum eroticum irrisorie ascripsisse. Fortasse hi sermones lepidi et aliquantulum procaces, Petrum Louÿs (Pierre Louÿs), alium lusorem amorum tenerorum, et in dicendo mordacem, exstimularunt ut dialogos suos spurcissimos et libidine sadiana supra modum instinctos conscriberet. Opus eroticum enim Petri Louÿs etiam speciem prae se fert librorum didascaliorum, etsi argumentum scilicet non nisi ad luxuriam spectat. Attamen, honos sit auribus, de scriptoribus vernaculis in foro latino loquor! Impensius imbutus litteris gallicis, quippe qui de tenero ungue Lutetiae cuiusdam parisiorum animo fictae vitam egerim, quodam modo, quamquam parum in venerem proclivis, gallico morbo laboro,. Qua de re, nimium tempus in lectione scriptorum eroticorum gallicorum pariter aetatis nascentis et saeculi duodevicesimi contrivi. Erotologus autem ille Fridericus Carolos Forberg mihi notus non erat. Libellum igitur eius De figuris Veneris statim ex interrete (ex situ quod google books vocatur) prehendi, cum haud facile hoc opus in bibliotecis inveniatur. Utinam autumnus messem tibi opimam afferat.

Cura ut valeas

Nicolaus Oscar sal.pl.

Plurimas gratias pro epistula prolixâ, quâ fusê explices, quid tibi videatur de erotologiâ Latinâ. De *Nicolao Chorier* iam scripturus sum symbolam; mihi in promptu est quaedam editio *Aloiseae* critica. Ceterum *Forbergius* eximiê laudat

Latinitatem Chorierii florentissimam. *Petrum Louys*, ut verum confitear, cum omnino nesciam, in eius opus incumbam proximam occasionem nactus. Novistine fratres *Beham* pictores Norimbergae impios, qui saeculo sexto decimo lascivas picturas pinxerunt? Latinê redditurus sum symbolam de iisdem scriptam. Haec hactenus raptim; cetera postea, si volueris, libentissimê. Medullitus Nicolaus.

PROF. TIM PIETZCKER ULMENSIS

Fri, 9 Jul 2021 15:53:10 +0200

Prof. Tim Pietzcker

Lieber Herr Dr. Groß,

John Linnell von der Rockband They Might Be Giants hat die COVID-bedingte Isolation dazu genutzt, ein Album mit Liedern auf Latein aufzunehmen: https://boingboing.net/2021/07/09/one-of-the-johns-from-they-might-be-giants-has-a-new-ep-of-songs-in-Latin.html?utm_source=rss&utm_medium=rss&utm_campaign=one-of-the-johns-from-they-might-be-giants-has-a-new-ep-of-songs-in-latin

Direkter Link zum Album: <https://tmbgshop.com/collections/all/products/john-linnell-roman-songs>

Der Musikstil ist vermutlich nicht jedermanns Sache, und vermutlich kann man auch über die Aussprache und andere Feinheiten streiten, aber ich dachte, das interessiert Sie vielleicht .

Viele Grüße

Tim Pietzcker

ANDREAS FRITSCH BEROLINENSIS

Nicolaus Andreae sal.pl.


Sat, 25 Sep 2021 17:39:42 +0200

Modo te vidi acroasin (Zoomianam) *Francisci Ploton-Nicollet* audientem et audivi te ex illo quaerentem, **quânam re Lucanus in odium Neronis venisset.** En lege, quomodo Suetonius explicet odium Neronis: subest facinus poetae omnino indecorum, quo artem poetandi Neronis irrisit necnon maiestatem eius laesit gravissimê! Phu diabole! Vae Lucano! Haec hactenus brevissimê, mi care sodalis, mox certê plura. Vale pancraticê! Medullitus te salutatur Nicolaus.

SUETONIUS, De viris illustribus: De poetis, cap.XXXIII M. Annaeus Lucanus. Revocatus Athenis a Nerone cohortique amicorum additus atque etiam quaestura honoratus, non tamen permansit in gratia: si quidem aegre ferens, <quod se> recitante subito ac nulla nisi refrigerandi sui causa indicto senatu recessisset, neque verbis adversus principem neque factis excitantibus post haec temperavit: adeo ut **quondam in latrinis publicis clariore cum crepitu ventris hemistichium Neronis magna consessorum fuga pronuntiarit:**

sub terris tonuisse putes.

CHRONOGRAMMATA HERBERTIANA




Zum 18. Oktober, dem **Fest des heiligen Evangelisten Lukas:**

2021* **LVC**as, **fV**ist**I** **MeDICV**s sap**I**ens et **eX**pert**V**s, **eV**ange**L**ista **Ver**itat**I**s et so**CIV**s **VeteranV**s Pa**VLI** nostr**I**, ora pro nob**I**s– Lukas, du warst der weise und erfahrene Arzt, Evangelist der Wahrheit und ein altgedienter Begleiter unseres Paulus, bitte für uns!

Zum 17. Oktober, dem **Fest des heiligen Ignatius von Antiochien:**

2021* **IgnatIV**s **TheophorV**s **antIoChenV**s **epIsCopV**s fort**I**s **MartYr** **IesV** **ChrIstI** pan**I**s p**VrV**s et **VerV**s a **LeonIbV**s **L**iber**I**s **DILanIatV**s est. – Ignatius Theophorus*, Bischof von Antiochien, tapferer Märtyrer Jesu Christi, ist als reines und wahrhaftiges Brot von frei gelassenen Löwen zermahlen worden**. – Ignatius von Antiochien, der sich in seinen Briefen an die Gemeinden, die er auf der Reise zum Martyrium in Rom besuchte, „Theophorus“ = „Gottträger“* nannte, war kein Masochist, sondern wollte, ** wie er im Brief an die Römer schrieb, „als reines und wahrhaftiges Brot“ von den Löwen in der Arena wie reines und wirkliches Mehl zermahlen werden. – Ignatius von Antiochien, ca. + 107 in der Arena Roms von Löwen getötet. - Variante: 2021* **IgnatIV**s **AntIoChenV**s **epIsCopV**s fort**I**s **MartYr** **IesV** **ChrIstI** **Vo** **LV**ntar**IV**s a **LeonIbV**s **ferIs** **Vere** q**VasI** pan**I**s **DILanIatV**s est. – Ignatius von Antiochien, Bischof und tapferer Märtyrer Jesu Christi, ist freiwillig von wilden Löwen wirklich wie Brot zermalmt worden.




Zwei weitere Etappen von Fest zu Fest auf dem Chronogrammatischen Jahresweg 2021 – herzlichst, Pe. Herbert Douteil, CSSp.

Zum 22. Oktober, dem **Fest des heiligen Papstes Johannes Paul II.:**

2021* eIa, oMnIa Mea sIne fIne tVa sVnt, o VIrgo pIa et fortIs. – Oh ja, alles, was mein ist, gehört immer dir, o Jungfrau! – nach Grignon von Monfort im Goldenen Buch: totus tuus!, was zum Wahlspruch von Johannes Paul II. wurde.

2021* eIa, totVs tVVs sIne fIne, MarIa Mater pIa et fortIs – Ja, ich bin immer ganz dein, Maria, gütige und starke Mutter! – Wahlspruch des Heiligen

2021* Is MarIae aIt: eIa, sIne fIne tVVs sVM! - 2021* MarIa aIt: eIa,, et tV erIs sIne fIne totVs MeVs! - Er sagt zu Maria:Ja, i ch bin ganz dein! - Maria sagt: Oh ja, und Du wirst ganz mein sein! – Gespräch zwischen Johannes Paul und Maria als Doppelchronogramm



Zum 23. Oktober, dem **Todestag von Bischof Heinrich RÜth CSSp.**
 2021* HenrIqVe RVeth nobIs aIebat: spIrItanI est MInIstrare, non MInIstrarI! –
 Heinrich RÜth sagte uns: Das Zeichen eines Spiritaners ist es, zu dienen, nicht
 bedient zu werden. - Dom Henrique RÜth, CSSp. (* 04/01/1913, Priesterweihe
 05/09/1939, Bischofsernennung: 22/06/1966; Bischofsweihe: 02/10/1966,
 Rücktritt 07/12/1988, + 23.20.2006) – Er hatte zwei Wahlsprüche: cor unum et
 anima una (ein Herz und eine Seele, Apg 4,32, der Wahlspruch der Spiritaner),
 und den eigenen: ministrare, non ministrari (dienen und nicht bedient werden –
 Mt 20,28), was er durch seinen unermüdlichen Einsatz als Missionar, Mitbruder
 und auch als Bauherr und in seinen Sozialwerken verwirklichte – im
 Chronogramm die brasilianische Form seines Namens Heinrich = Henrique

ECCE LIBRI LEONIS LATINI

Permittas, quaeso, ut nuntium adiungam minus gratum: pretia discorum, qui a Leone Latino praebentur vendendi, ex decennio (sic!) non exaucta - proh dolor – nunc valdê augenda sunt (denis euronibus). Interim enim cum pretia materiarum quoque multo exaucta sint, tum praecipuê disci libellique discis subiungendi non conficiuntur neque involvuntur nisi magno cum labore.

Restat, ut afferam titulos pretiaque librorum typis impressorum, qui hōc tempore apud Leonem Latinum prostant venales:

- | | |
|---|---------|
| 1) CRABATUS (Otfried Preußler, Krabat)..... | 49,00 € |
| 2) FRAGRANTIA (Patrick Süskind, Das Parfum)..... | 42,00 € |
| 3) RECITATOR (Bernhard Schlink, Der Vorleser)..... | 45,00 € |
| 4) HOTZENPLOTZIUS (Otfried Preußler, Der Räuber Hotzenplotz)..... | 25,00 € |
| 5) ARANEA NIGRA (Jeremias Gotthelf, Die schwarze Spinne)..... | 22,00 € |

PARVUS NICOLAUS (René Goscinny, Le Petit Nicolas) non êditur in domunculâ Leonis Latini, sed in Aedibus Turicensibus, quae appellantur «Diogenes».

GLOSSARIUM FRAGRANTIAE et PERICULA BARONIS MYNCHUSANI – proh dolor! – sunt divendita. Utinam nobis contingat, ut aliquando edantur iteratis curis.

Habeas nos excusatos, quod situm interretialem (i.e. anglicê »website« nondum restauravimus novaque pretia ibidem nondum indicavimus.

Ceterum, cara Lectrix, care Lector, bene scias oportet Leonem Latinum non esse megalopolium, quo – ut ita dicam - rapidissimê eiectantur multae myriades librorum vilissimae, sed domunculam potius virtuaalem quam realem, in qua creantur κειμήλια, id est res parvae et rarae et carae. Res parvae enim sunt disci compacti aut libelli typis editi palmares; rarae sunt editiones, quae centuriam tantum complectantur exemplorum; carae sunt hae res omnes, quia cordi sunt Leoni Latino recordanti horas illas innumeras, quibus operam dedit illis creandis.

Cara Lectrix, care Lector, utinam omne opusculum a Leone Latino confectum sit Tibi KTHMA EIS AEI.

INDEX DISCORUM LEONIS LATINI

NR	Num. mandataelae	ISBN	TITULUS	AUCTOR	TRANSLATOR	ANNUS	FORMA	AMPLI-TUDO	PRE-TIUM
1	00104	978-3-938905-00-5	FABELLA TEXTORIS VERSUTI PALAEOINDICA	Anonymus (Old Indian)	Nikolaus Gross	2004	CD-ROM pdf	7 pp.	€ 17,90
2	00104A	978-3-938905-15-9	FABELLA TEXTORIS VERSUTI PALAEOINDICA – Libri audibiles	Anonymus (Old Indian)	Nikolaus Gross	2005	Audio	21 min.	€ 22,90
3	00204	978-3-938905-01-2	TRES FABULAE EDGARII ALLANI POE: CATTUS NIGER - RANUNCULUS - PUTEUS ET PENDULUM	Edgar Allan Poe	Nikolaus Gross	2004	CD-ROM pdf	33 pp.	€ 27,50
4	00304	978-3-938905-02-9	ANECDOTA REI PROXIMO BELLO BORUSSICO FACTAE	Heinrich von Kleist	Nikolaus Gross	2004	CD-ROM pdf	6 pp.	€ 17,90
5	00304A	978-3-938905-16-6	ANECDOTA REI PROXIMO BELLO BORUSSICO FACTAE – Libri audibiles	Heinrich von Kleist	Nikolaus Gross	2004	Audio	6 min.	€ 20,90
6	00404	978-3-938905-03-6	MEMENTO MORI	Alexander Saxon	Nikolaus Gross	2004	CD-ROM pdf	7 pp.	€ 17,90
7	00404A	978-3-938905-17-3	MEMENTO MORI – Libri audibiles	Alexander Saxon	Nikolaus Gross	2005	Audio	20 min.	€ 21,90
8	00504	978-3-938905-04-3	DE CRAMBAMBULO	Marie von Ebner-Eschenbach	Nikolaus Gross	2004	CD-ROM pdf	14 pp.	€ 19,50
9	00604	978-3-938905-05-0	DE DINOSAURIS	Nikolaus Gross	-----	2004	CD-ROM pdf	16 pp.	€ 19,00
10	00704	978-3-938905-06-7	SUDATORIUM VENERIS	Diogenes Anaedous	-----	2004	CD-ROM pdf	11 pp.	€ 19,50
11	00804	978-3-938905-07-4	PERICULUM FRANCISCI	Diogenes Anaedous	-----	2004	CD-ROM pdf	7 pp.	€ 17,90
12	00904	978-3-938905-08-1	NUPTIAE ABDERITANAE	Bertolt Brecht	Nikolaus Gross	2004	CD-ROM pdf	21 pp.	€ 22,00
13	01004	978-3-938905-09-8	TESTAMENTUM REYNERI BERLBYN	Henricus van den Lande de Raelt	-----	2004	CD-ROM pdf	7 pp.	€ 17,50

14	01104	978-3-938905-10-4	DE SANCTO NICOLAO DEQUE VIRO NATALICIO	Nikolaus Gross	-----	2004	CD-ROM	21 pp.	€ 22,00
15	01204	978-3-938905-11-1	FABELLAE GRIMMIANAE 1	Jacob Grimm/ Wilhelm Grimm	Nikolaus Gross	2004	CD-ROM pdf	28 pp.	€ 24,90
16	00105	978-3-938905-12-8	ROMULUS MAGNUS	Friedrich Dürrenmatt	Nikolaus Gross	2005	CD-ROM pdf	49 pp.	€ 31,90
17	00205	978-3-938905-13-5	DE THILO CUSTODE FERRIVIAE	Gerhart Hauptmann	Nikolaus Gross	2005	CD-ROM pdf	28 pp.	€ 24,90
18	00305	978-3-938905-14-2	HISTORIA AGATHONIS (LIB.1)	Christoph Martin Wieland	Nikolaus Gross	2005	CD-ROM pdf	15 pp.	€ 19,50
19	00405	978-3-938905-19-7	WERTHER IUVENIS QUAE PASSUS SIT	Johann Wolfgang von Goethe	Nikolaus Gross	2005	CD-ROM pdf	82 pp.	€ 38,90
20	0050 5A	978-3-938905-22-7	CICERONIS ORATIONES IN CATILINAM HABITAE 1 – Libri audibiles	M.T. Cicero	-----	2005	Audio	40 min.	€ 21,90
21	0060 5A	978-3-938905-18-0	SOMNIUM SCIPIONIS A CICERONE SCRIPTUM – Libri audibiles	M.T. Cicero	-----	2005	Audio	30 min.	€ 20,90
22	0070 5A	978-3-938905-23-4	CAESARIS BELLUM GALLICUM 1 – Libri audibiles	C.I. Caesar	-----	2005	Audio	55 min.	€ 22,90
23	00106	978-3-938905-21-0	AUTOBIOGRAPHIAE LATINAE	Nikolaus Gross	-----	2006	CD-ROM pdf	87 pp.	€ 48,00
24	00206	978-3-938905-20-3	DISQUISITIO CHEMICA ACIDULARUM BERGENSIUM ET GOEPPINGENSIIUM	Karl Friedrich Kielmeyer	Nikolaus Gross	2006	CD-ROM pdf	66 pp.	€ 38,00
25	0030 6A	978-3-938905-24-1	CAESARIS BELLUM GALLICUM 2 – Libri audibiles	C.I. Caesar	-----	2006	Audio	61 min.	€ 22,90
26	0040 6A	978-3-938905-25-8	CICERONIS ORATIONES IN CATILINAM HABITAE 2 – Libri audibiles	M.T. Cicero	-----	2006	Audio	41 min.	€ 21,90
27	0050 6A	978-3-938905-26-5	EPISTULAE A SENECA AD LUCILIUM SCRIPTAE 1 – Libri audibiles	L.A. Seneca	-----	2006	Audio (2 CDs)	88 min.	€ 27,90

28	00107 A	978-3- 938905-27- 2	ASINUS AUREUS AB APULEIO SCRIPTUS	Apuleius	----- --	2007	Audio	55 min.	€ 23,90
29	0020 7A	978-3- 938905-28- 9	OBSIDIO SAGUNTI A T.LIVIO DESCRIPTA	Livius	-----	2007	Audio	53 min.	€ 23,90
30	00307	978-3- 938905-29- 6	FABELLAE GRIMMIANAE II	Jacob Grimm/ Wihelm Grimm	Nikolaus Gross	2007	CD- ROM pdf	58 pp.	€ 32,90




CARA LECTRIX, CARE LECTOR, BENE VALE,

USQUE AD SEPTIMANAM PROXIMAM !



**HANC EPISTULAM LEONINAM
DUCENTESIMAM QUADRAGESIMAM QUINTAM
SENDEN IN OPPIDULO BAVARIAE SUEBICAE PERFECIT**



**Die Mercurii
27. m.Oct. a.2021**



Dr. Nicolaus Groß
LEO LATINUS
Sodalis Academiae Latinitati Fovendae